



**KEMENTERIAN PERLADANGAN DAN KOMODITI
MALAYSIA**

KENYATAAN MEDIA

**PORTSIM 20 TAHUN: PEMACU KERJASAMA INDUSTRI SAWIT MALAYSIA–
CHINA MELALUI INOVASI DAN DIPLOMASI SAINTIFIK**

SHANGHAI, CHINA, 19 MEI 2025 – Komitmen Malaysia untuk mengukuhkan kehadiran dalam pasaran minyak sawit bernilai tinggi di China terus diperkukuh dengan peranan strategik yang dimainkan oleh Institut Penyelidikan dan Khidmat Teknikal Minyak Sawit Malaysia di Shanghai (PORTSIM).

Menurut Timbalan Menteri Perladangan dan Komoditi, Datuk Chan Foong Hin, PORTSIM kini muncul sebagai enjin utama diplomasi ekonomi berasaskan sains dan inovasi, dan telah menyumbang secara langsung kepada peningkatan eksport minyak sawit Malaysia ke China secara mampan dan berimpak tinggi sejak dua dekad lalu.

“Pelaburan Malaysia dalam bidang penyelidikan dan pengkomersialan (R&D&C) menerusi PORTSIM membuahkan hasil nyata — bukan sahaja dari segi peningkatan nilai eksport, malah turut memperkukuh kedudukan minyak sawit Malaysia sebagai bahan asas berkualiti tinggi dalam pelbagai sektor pengguna akhir di China,” katanya.

Tambah beliau, hasil aktiviti R&D&C PORTSIM telah menyumbang nilai eksport produk sawit Malaysia sebanyak RM357.98 juta pada tahun 2024, iaitu 13.56% lebih tinggi berbanding nilai produk sekiranya dijual sebagai komoditi mentah.

Beliau berkata demikian ketika berucap di Majlis Sambutan Ulang Tahun ke-20 PORTSIM yang berlangsung di Hotel Qiantan Shangri-La, Shanghai, pada malam Ahad lalu. Turut hadir dalam majlis tersebut ialah Ketua Setiausaha Kementerian Perladangan dan Komoditi, Dato' Yusran Shah Mohd Yusof; Ketua Pengarah MPOB, Datuk Dr. Ahmad Parveez Ghulam Kadir; dan Pengurus Besar PORTSIM, Yoong Jun Hao. Majlis makan malam tersebut menghidangkan masakan yang menggunakan minyak sawit merah, termasuk daging lembu dalam sup masam, ayam rebus, dan abalon tumis.

PORTSIM, sebagai cawangan rasmi Lembaga Minyak Sawit Malaysia (MPOB) di China, berperanan sebagai jambatan kerjasama erat antara Malaysia dan China dalam aspek penyelidikan teknikal, pembangunan aplikasi minyak sawit dan pengukuhan hubungan industri dua hala.

Sejak ditubuhkan pada tahun 2005, PORTSIM telah menjadi pemangkin kepada pelbagai aplikasi minyak sawit dalam sektor makanan, oleokimia dan makanan ternakan

berasaskan sawit menerusi kerjasama dengan universiti, pusat penyelidikan dan syarikat swasta China. Kejayaan ini termasuk penghasilan formulasi baharu produk berasaskan minyak sawit untuk aplikasi makanan, oleokimia, dan makanan ternakan yang disesuaikan dengan pasaran China; pembangunan inovasi produk baharu; serta penyediaan sokongan teknikal kepada industri tempatan — kesemuanya telah membantu meningkatkan penggunaan dan permintaan terhadap minyak sawit Malaysia dalam landskap perindustrian China yang pesat berkembang.

“PORTSIM turut membantu memperluas penggunaan minyak sawit Malaysia dalam pelbagai segmen pengguna akhir seperti makanan segera, kuih-muih dan pastri, sabun, pencuci harian, kosmetik, serta makanan ternakan dan makanan haiwan peliharaan. Khidmat nasihat teknikal yang ditawarkan turut memperkukuh keyakinan industri terhadap minyak sawit Malaysia sebagai bahan asas premium yang mampan,” ujar Chan.

Tambah beliau lagi, Kementerian Perladangan dan Komoditi (KPK) melihat kejayaan PORTSIM sebagai contoh terbaik diplomasi ekonomi berasaskan sains dan nilai tambah yang menyokong misi negara untuk menjamin kelangsungan dan daya saing industri sawit di peringkat antarabangsa.

“Pada tahun 2024 sahaja, Malaysia telah mengeksport hampir RM10.6 bilion nilai produk minyak sawit ke China, mewakili lebih separuh daripada jumlah eksport komoditi pukal Malaysia ke China,” katanya.

Melangkah ke hadapan, MPOB dan PORTSIM akan terus memperkukuh kerjasama strategik bersama KPK dan rakan industri di China bagi meneroka peluang baharu, memperluas penyelidikan bernilai tinggi, serta meningkatkan penerimaan dan penggunaan minyak sawit Malaysia sebagai produk yang berkualiti, mampan dan berinovatif tinggi.

KEMENTERIAN PERLADANGAN DAN KOMODITI
19 MEI 2025